

Vorarlberger Landesarchiv Urkunde Nr. 8459
20. März 1534

Ich Hans Albrich zu Dorrenburen im oberdorf gesessen beken öffentlich für mich min erben unnd nachkomen unnd thun kundt aller mengklichen mit disem Brief dass ich mit wolbedachten sin und mutte mit Zittiger vorbetrachtung von min bessern nutz wegen dem Erbarn und beschinden Hansen Riefen von Mülebach der Zyt deß Edlen und Vesten Junckher Burckharts von Ems zu der Hohenems Amman Ains stätten vesten Immerwerenden unnd ewigen koufs wie dann der yetzo und hinfüro vor allen Lütten Richtern unnd gerichtten Gaistlichen und weltlichen zur kraft und macht hat haben sol und mag recht und redlich verkouft unnd zu kouffen geben hab in craft dis Briefs Namlich min aigen Hus Hoffe Hofstat sambt Krutgarten den Reben und trietern alles mit tach gemacht mit aller In und Zugehörd nutz, usgenommen noch hindan gesetzt alles für fry recht unbekümert Ledig aigen stost vornen an die gassen unden uff Hans Brotschälting ußwertz an den stainebach oben an Cunrat Cönis sälligen Hofstat. Und ist dieser kouff zu gangen und beschehen umb Funftzig und acht Pfund pfening gutter Dis Lands Werung Dero er anstat obgents Junckher Burckharts mich gantz us gericht und die Im minen nutz und Fromme bewendt und angelägt Hab Also sol und mag der ob gemelt min gnädiger Junckher sin erben und nachkommen Das gemelt Hus und Hoff mit aller Zugehörd als ob stat Nun hinfüro ewigklich und geruwigklich In Haben nutzen niessen verlihen versetzen verkouffen und sunst In allweg damit gefarn Handeln thun und Lassen wie und was sy Wöllen als mit anderm irm Aigen und erkouffen gut von mir min erben und nachkomen und mengklichs von usert Wegen daran gantz umdhindert und ung..zart in allweg. Dan ich mich Hier an für mich min erben und nachkomen aller aller vorderung ansprach recht und gerechtigkeit so ich bis Her dar zu und dar an gehöpt Hab oder füro Hin überkomen möchte gar und gantzlich verzigen und begeben hab verzihe auch mich des alles Inkraft dis Briefs Ich ob genant verköffer min erben und nachkomen söllend auch dis koufs sond was in disem Brief geschriben stet gegen gedachten Junckher Burckharten sin erben und nachkomen rech gertruw tröster und Weren sin für allen abgang auch für aller mengklichs Irrung und ansprach nach dis gerichtts und Landsrecht zu Dorrenburen Alweg in unserm costen und one irm schaden Und das alles Zu warem und vestem Urkundt so hab ich ob genanter Hans Albrich mit ernst erbetten Den Ersamen und Wisen Josen Wächingern der Zyt Amman zu Dorrenburen Das er sin aigen Insigel an disen Brief hat thun Hencken Doch im und sin erben one schaden Der geben ist uf Freitag vor unser Hohen Frowen tag verkindung Als man zalt von Cristi unsers hohen Herren geburt funftzehen Hundert Drysig und vier Jahre.

Rückseite:
Hans Albrich
Khauffbrieff umb das Weingärtlin am Stainibach